

23. februar 2017

Inatsisartut suleriaasianni § 37 naapertorlugu matumuuna Naalackersuisunut imaattunik apeqquteqaatinik saqqummiussivunga:

Apeqqutit:

- 1. Ukiup affaa maanna ingerlareersimalerput § 37 naapertorlugu apeqquteqaatinnut 121/2016-imi Naalackersuisut akissutimikkut neriorsuimmata Kalaallisuuliornermik Ilinniarfik kajumissaarniarlugu Tasiilami pikkorissaanissanik aallartisaaqqullugit, taamatuttaaq Kommuneqarfik Sermersooq inimik naleqquttumik pikkorissarfiusinnaasumik ujaarleqqullugu. Naalackersuisut neriorsuutitik naapertorlugit saaffiginnissimappat, taamaasimappallu Naalackersuisut sunik akissutisisimappat?**
- 2. Kalaallisuuliornermik Ilinniarfik Aningaasaqarnermut inatsisitigut ukiumoortumik 2,7 mio. kr.-inik tapiiffigitittarpoq. Assingusumik s.a. Tasiilami namminersortumik tunumiut nammineq kalaallisuuliornermik Ilinniarfittaassappata, ingerlatsinissamut aningaasartuutit qanoq annertutigissagaluarpat ? Aningaasaliissutissat annertussusis-saat assingussagaluarpat?**
- 3. Tasiilami Ilinniarfissamik taamaattumik pilersitsisoqassappat iniusinnaasunik attartuisoqarsinnaava, imaluunniit pilersinniarnernani sanaartornissamut aningaasartuuteqarnissaa naatsorsuutigeriissavarput - taamassappallu sanaartornissamut aningaasartuutigiumaakkat qanoq annertutiginnissaat naatsorsuutigineqarpa?**

(Inatsisartuni ilaasortaq, Laura Tàunâjik, Siumut)

Tunngavilersuut:

Kalaallisuuliavut tanngassimaarluta atortarpavut. Pinnissusia assassorlunilu suliap kusanaqisup alutorsaatigisaqaarput; peqqissaarutigeqqissaarnera, pikkorissutsikkut asanninnikkullu tunngaveqarluni sanaajunera alutoreqaarput. Kalaallisuuliavut kalaallisut kinaassutsitta ilagilluinnarpaat minnerunngitsumillu aamma kulturitta aamma ilagilluinnarlugu, tassanerpiarlu tamatta kissaatigaarput qaqugumulluunniit paarilluarlugillu atajuaannassasut. Assassorlluni suliap, ilami eqqumiitsuliarsuatut isigalugu kalaallisuuliaq eqqaamaneerutissannigilaq, kinguariinnut nutaanut tunniullugulu ingerlateqqittariaqarpoq.

Tamanna aamma tungaviusimassaaq Kalaallisuuliornermik Ilinniarfik Sisimiuni pilersikkatsigu.

Nunatta Avannaarpiaani aamma Tunumi kalaallisuuliornerup assigiinngissusaa ersersinneqarluarpoq. Tamatumani arnap kalaallisui aammalu angutip assuutaat pineqarput. Tamakkua aamma Kalaallisuuliornermik Ilinniarfimmi ilikarneqarsinnaapput – taamatummi paasivara. Tunumiut qassit maannamut Kalaallisuuliornermik Ilinniarfimmi Sisimiuniittumi ilinniarsimappat? Qassimmita piviusumik isigalugu periarfissaqartitaappat?

Apeqquut uanniippoq, ilumut ilisimannineq naammattoq, pigineqarnersoq Tunumiut kalaallisuat mersorniaanni, ilumut siunissamut ungasinnerusumut isigalugu ataavartumik pigineqarsinnaanersoq, najukkami ilinniartitsinissamut periarfissat atorluangikkaanni.

Tassunga tunngatillugu aamma malugeqquneqarpoq, Tunumi annertuumik atorfissaqartitsisoqarmat najukkami ilinniartitaanikkut, suliffissaqartitsiniarnikkut aammalu inuussutissarsiutitigut siuarsaaniarnermi periarfissat eqqarsaatigalugit.

Tunumi assassornikkut eqqumiitsuliornermi ileqqorpassuaqarpoq atorluarsinnaalluartunik, uggornartumillu najukkami ilinniartitaanikkut suliffissaqartitsinikkullu periarfissalulluni. Tasiilami kalaallisuuliornermik ilinniarfiliorneq suliatus isigalugu annertugisassaangikkaluartoq, taamaattoq najukkami naleqartitatigut annertoorujussuarmik siursaaqataasinnaavoq assassornikkut ileqqutoqqat siursarniarlugit suliniuteqassagutta, minnerunngitsumik ileqqutoqqat taakkua Tunumi kinguaariinni kinaassusiliilluarsimammata.

Tamanna tunngavigalugu neriuutigaara, Tunumi kalaallisuuliornermik ilinniarfiliornissamik pilersitsiniarneq soqutigineqarluarlunilu tapersersoqarluarumaartoq.